

Wárágà Pólò dré tisìle Fìlèmonà dré dhi

Wárágà kònìdhi ni tà àndu ngìle drìdrì dhi

Kònìdhi wárágà Pólò dré tisìle Fìlèmonà dré dhi 'i. Fìlèmonà nda tá mómí kàdrì Yésu ni ka'ilepi, adrélèpi Ekèlézyà Kòlòsáyì àdhyà na dhi 'i. Akódhi tá màràbà àlo rú be Onèsímò dhi ìbe. Onèsímò nda lapá tá Fìlèmonà drígàsè lile ru kisú Pólò be bǎdzó na. Di Pólò dré akódhi ni togó asézó Yésu ni ka'ì gò, dré kisùzoá dóro ni, í dré akódhi ni logólé líyí ni véna dhi.

Pólò adrè di wárágà kònìdhi ni tisì Fìlèmonà ni ti lizízó, kòtrìró áyì màràbà nda ni tàkonzì, akódhi ni ka'izo dòle ngóro áyì adrúpi Krísto na dhi ró. Pólò adrè leá dhi, Fìlèmonà kò'o tà nda kònìni ngóro tòlí bhàle í dri dhi tìni ko, be ró dhi, ngóro dré lèle 'òle áyì lèle Krísto na dhi sè dhi tìni.

Tà kàdrìkàdrì wárágà kònìdhi léna dhi kí atìma

Pólò ni mòdo fèma (1:1-3)

Pólò ni àwoyà fèma Fìlèmonà ni tà sè dhi (1:4-7)

Fìlèmonà ni ti lizìma Onèsímò ni tà sè dhi (1:8-22)

Pólò ni kúlí kùdù (1:23-25)

Pólò ni mòdo fèma

¹ Ma, Pólò 'ìle bǎdzó kòndi 'á Yésu Krísto ni tà sè dhi, túmání àma kí adrúpi Tímòtéyò be

dhi, mà adré wárágà kònìdhi ni tisi mi, àma ki àziàmú Fìlèmonà mà dré lèlè tò dhi dré.

² Mà adré kpà tisiá àma ki amvúpi Apíyà dré, àma ki àdzú bhuàmú Arùkípò dré, ìndì mónnyá Èkèlézyà àdhya adrèbhá ru kimó ámi dzó na dhi ì dré.

³ Gìká àma ki Atá ì Mírì Yésu Krísto be dhi ì kòbhà àyi ki togó tani àmi rú, ìndì ì kòfè tà kìdrìkìdri àmi dré!

Pólò fè àwoyà Fìlèmonà ni tà sè

⁴ Lókyá má dré adrérà'a tà zi Gìká tí dhi 'á dhi, má adré ngbú adrélé àwoyà ta akódhi dré ámi tà sè, adrézó kpà tà zi akódhi tí mí dré.

⁵ Tàko ko, má adré ámi tà ka'ìka'ì Mírì Yésu na dhi ni tà yi, túmání ámi lèlè mí dré adrélé tadhálé mónnyá lólo títi Gìká àdhya ì véna dhi ni tà be.

⁶ Má adré di tà zi Gìká tí, ámi tà ka'ìka'ì nda kàdréro lò'wa 'a bí, mí kònìró tà tani títi mà dré adrézó ába Yésu Krísto na dhi ì be dhi bvó.

⁷ Áma adrúpi, ámi lèlè òmbà áma togó gàlè arí sè bí, mí dré mónnyá Gìká àdhya ki togó tindrìlè dhi sè.

Pólò lizí Fìlèmonà ni ti Onèsímò ni tà sè

⁸ Àsà dhi, tágba má dré tá kitswázó tòlì fe mí dré Krísto na tà kitswálépi mí dré 'òlè dhi sè dhi,

⁹ má adré mána ámi ti lizí lèlè sè. Di, ma, Pólò màlìga ró 'ìlè nyànomvá bãdzó 'á Yésu Krísto ni tà sè dhi,

¹⁰ má adré ámi ti lizí áma mvá Onèsímò ni tà sè. Tàko ko, akódhi nda atsá áma mvá ro Krísto na kònwa bãdzó 'á.

11 Wáláká dhi, akódhi tá mómndí tàko 'i mí mílèsè. Dì, nyànomvá dhi, akódhi ína mómndí kitswálépi àma ki ledé tùmání mí be dhi 'i.*

12 Má adrè akódhi nì logó mí véna, tágba akódhi dré adrézó áma tàndì nì togó 'i dhi.

13 Má lè tá tò akódhi nì kíkílé ànyì má làga kònwa, kòledéro ma ámi àrà 'a, má dré adrérà'a bà nya Rúbí Tani nì tà sè dhi 'á.

14 Dì, má kitswá tá 'òá kònìnì mí dré ka'íá àko ró ko. Be ró dhi, má adrè làá dhi, mí kò'o tà dóro ngóro mí dré lèle 'òle dhi tìni, ngóro tòlì bhàle mí dri dhi tìni ko.

15 Aruka nì, mì lanzí tá ru Onèsimò be lókyá tsà sè, mí kògòro akódhi nì kisú adrézó ába nyo be dhi bvó.

16 Nyànomvá dhi, akódhi véle ngbà 'í màràbà 'i ko. Akódhi lavú véle màràbà byá. Akódhi adrúpi má dré mána lèle tò dhi 'i. Dì, lavulé dhi, akódhi nì adrè mómndí mí dré dra lèle tò dhi 'i, ìndì adrúpi mí dré dra lèle tò Mírì na dhi 'i.

17 Dì ásà dhi, mí kàdré áma no ámi arúpi ró dhi, mí kòka'ì akódhi ngóro mí nì tá áma tàndì nì ka'ì kòdhya na tìni.

18 Akódhi kò'o mì kònzi yà, kó ngalè kàdré ámi màri íbe í rú yà dhi, mí kòbhà màri nda áma rú tí.

19 Ma, Pólò, má adrè kúlí kòni ki tisì áma tàndì nì drígá sè: Má nì màri nda nì logó mí dré. Kònò má nì tá kitswá tàá dhi, mì mína áma màri íbe mí rú, ìndì màri nda ámi tàndì nì lídrì 'i.

* **1:11 1:11** Rú «Onèsimò» kònìdhi adrè làá tàle dhi, «dhya adrélépi mómndí ki ledé dhi».

²⁰ Di áma adrúpi, má adré làá mí kò'o tà nda kòdhi má dré Mírì ní rú sè. Mí kòtindrì áma togó Krísto na.

²¹ Má adré wárágà kònìdhi ní tisì mí dré, adrézó ka'íá dhi, mí ní áma kúlí ka'í 'òle. Má nì, mí ní vélé tà 'o tà má dré adrélé zìle kòdhi ní lavú byá dhi be.

²² Kòdhi íbe dhi, mí kòledé àrà má dré kitswázó ayilé mí véna dhi be. Tàko ko, má adré mǐ bha Gíkà véna, kònziró láti má dré gòzo tsàle àmì véna, ngóro mǐ dré adrélé zìle akódhi tí dhi tǐni.

Pólò ní kúlí kùdù

²³ Epàfùrà mà dré adrézó bã nya ába Yésu Krísto ní tà sè dhi, fè mòdo mí dré.

²⁴ Márokò, Arìstàrukò, Démà, tsàle Lúkà be, áma àzìàmù ró dhi, ì fè kpà mòdo mí dré.

²⁵ Mírì Yésu Krísto ní togó tani kàdré àmì íbe!

Logo (Logoti)
Logoti (Logo): BUKU TA TIDHI//RU YIZO DHI ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source
files dated 10 May 2025

942af0a0-42ea-5477-8f1a-fed39823f32b